

## **Poldi Kolosihidok pepa youyemguk Yodakale Mede**

Kolosi wonjadi yokwet wapum niŋ kwet faki niŋ Esiya wendok gineŋ ikuk. Eŋ Efeso yokwet wapumdi maan unduŋon kabe-yamaingon unŋon ikuk. Kayonbop Kolosi yokwet wapumneŋ u Pol ne mu tubumintaguk, inŋon Poldi Efeso yokwet wapumneŋ hali me noli yeniŋkulune kwet faki wendiniŋ maaneŋ Mede Momoon yoyo tiyaugin hekidi Koloside maan ugin.

Me nolidi nadisukilitihik tubugiyondane tiin unduŋ nadiŋa Poldi nadisuhik tubukilitiyem-dok pepa i kameyemguk. Kameyemuŋa indin yeniŋguk. Kilisto adi nemenemek hogohogok diniŋ mebi. Nihitubulodaan kotigon ninigit-dok talik kubuŋon adi Kilisto hogok, talik ni-maanŋon nemu hatak. Talik noli adi ninig-ilune Kilisto bikabuŋa kweetniŋ uundok hogok hakiin. Kilisto gineŋon Bepandi nemenemek hogohogok tubumintaguk, doktiŋa Kilisto'walaŋ kwanai gineŋon Bepandi nemenemek hogohogok kotigon moŋgotdok nadilak. Kilistodi welenik gineŋ halune indi metam kobuhi hogohogok mintadapmaan Kilisto'walaŋ titiŋniŋ u takalidok.

Poldi pepa i youla meyat lufom yembune meyat wendi pepa i tiŋa Koloside ugumuk. Me niŋ e Tikikus, eŋ me noli Onesimas, me yendegon Poldi

Filemondok pepa youlimingukneŋ unŋŋ mede fee hinek youkuk.

*Yokahan eŋ welemomoon mede*

<sup>1</sup> Pol, nu Bepaŋ'walaŋ maŋiŋ mede tiloon Jesu Kilisto'walaŋ Aposel tugut, eŋ notnik Timoti <sup>2</sup> indi Kolosi yopmaŋhi Jesu nadisukilitimiin eŋ Kilisto'walaŋkade woonŋ galiin, hiditok pepa i youhamamut.

Bepaŋ Betnik'walaaniŋ silonŋ tobogonŋ eŋ kulema hidut haliwoonŋ hatuwaak.

*Kolosihi adi Jesu nadisukiliti hinek timingin*

<sup>3</sup> Biyagonŋ kuyonŋ, indi hiditok tiŋa Wapumnik Jesu Kilisto adi'walaŋ Beu Bepaŋ helemahelamaŋ niutumbaanŋ ninadiyamut. <sup>4</sup> Hidi Kilisto Jesu nadisukilitimiin, eŋ metam nadisukilitihinit kwetkwet hatiŋa wiinŋ maanŋ welesilonŋ tiyemiin. Hidi'walaŋ kahat u nadiŋa Baŋ Bepaŋ hati niutumbayamut. <sup>5</sup> Eŋ hidi nadisukiliti hogok mu tiinŋ. Hidi Mede Biyagonŋ diniŋ kiliki hinek Mede Momoonŋ hidi'walaŋkade mintaune nadiginŋ doktiŋa Bepaŋdi nemek momoonŋ hiditok kunum ginŋ tiulidokohamunguk wendok nadikunakunale tiinŋ. <sup>6</sup> Kahat u kwetkwet hautaanŋ woonŋ foloonnit tilak. Kaŋ Bepaŋ'walaŋ silonŋ tobogonŋ diniŋ mededi hidi'walaŋkade uune biyagonŋ hinek nadikahile tiginŋ, nai unaningonŋ hidi'walaŋkade foloonnit tuguk. <sup>7</sup> Biyagonŋ kuyonŋ, notnik momoonŋ hinek, Epafala, Kilisto'walaŋ kwanai-me mede tilolonŋ mohinek tilak, adikuyenŋ hanin-didimeune nadiginŋ. <sup>8</sup> Tiŋa adigonŋ Munabulidi

hidi'walaŋkade welesiloŋ tubumintaguk wendiniŋ mede kahat tinimguk.

*Bepaŋ'walaŋ mede nadihinakaŋ wondiniŋ folooŋ tubumintadok*

<sup>9</sup> Kaŋ indi mede kahathik u nadiŋa nai uŋaŋiŋgoŋ tububihila helemahelman hidi Bepaŋ'walaŋ maŋiŋ mede u nadihinakanen yona hati-ninadiyamut. Uyadi indiŋ. Bepaŋdi Munabuli diniŋ nadisu-fuliŋgoŋ eŋ nadinadi u welehek maanenŋ tububediune hidi adi'walaŋ maŋiŋ mede nadidakale-hinakayaneenŋ.  
<sup>10</sup> Biyagoŋ kuyoŋ, Wapumdi unduŋ tihambune hidi adi'walaŋ wapmihiniye hinek hatibune hatihatihikdi mebiŋiŋ yohautaune habunadiune utumbaluwaak. Eŋ Bepaŋ'walaŋ titiŋ momohi mebimebi fee hakiŋ u tiŋa wondiniŋ folooŋ yehitubu-mintaneenŋ. Unduŋ tiŋa Bepaŋ'walaŋ mebi nadihinaka tiyaneenŋ. <sup>11</sup> Tiŋa Bepaŋ'walaŋ saŋiniŋ beweniŋgoŋ wondi hehiulihiune fafaŋe hinek tiŋa yalune malabumuŋ mebimebidi hidi foloŋ loune hidi wondoktiŋa mu gweheyeneenŋ. Adi tobo fafaŋe tiŋa kulemaŋgoŋ hatibune nemenemek u mintadapmawaak kaŋ hidi wendoktiŋa welemomooŋ nadineenŋ. <sup>12</sup> Tiŋa undugoŋ Betnik adi wahinŋ kunum hauta ginenŋ nemenemek wapmihiniyedok gigit boiyemguk u nadisukilitihinit indi molomolom bedok nihitiulidokoguk. Unduŋ doktiŋa indi nadifo foloŋ niutumbayaneem.

<sup>13</sup> Bepaŋ adi mambip molom'walaŋ saŋiniŋ gineniŋ nihikagiyali ninigila mihiniŋ momooŋ, ne kahile tilak, adi'walaŋ hebenŋ ginenŋ nipmeguk.

<sup>14</sup> Mihiniŋ adigoŋ kadakaniniŋ tumolokutnimdok kayoŋkoŋnik tiŋa malabumuŋnik beguk. <sup>15</sup> Biyagoŋ kuyoŋ, Bepaŋ hebiniŋ'walaŋ folonamandap miŋgoŋ mintaminta u Mihiniŋ foloŋ mintaguk. Adi yadi nemenemek hogohogok u mu mintalune koomkwaha hatitabugukdi hatilak, eŋ hatibaak fafaŋeniŋ. <sup>16</sup> Nemenemek hogohogok kunum gineŋ be kwetfoloŋ hatak uyadi adi'walaŋ saŋiniŋniŋ gineŋ mintadapmaguk. Nemenemek yabu tiyam be mu yabam, metam be aŋelo, saŋiniŋ loloŋnit be fafaŋeniŋ, wapum loloŋnit be mulelem tiyemdok hogohogok u adi'walaŋ saŋiniŋ gineŋ eŋ netok gigit mintaguk. <sup>17</sup> Adi yadi nemenemek hogohogok wendiniŋ mebinengoŋ tububihila hatigukdi hatilak. Tiŋa undugoŋ nemenemek hogohogok u adigoŋ ulihiune halibulak.

*Kilisto adi indi'walaŋ Wapum eŋ Loloŋnit*

<sup>18</sup> Tiŋa biyagoŋ kuyoŋ, Kayoŋbop adi adi'walaŋ kayoŋ kohoŋ. Kaŋ ne adi mebinik hatilak. Tiŋa Kayoŋbop u adigoŋ tububihikuk eŋ kumuŋ gineniŋ pilapilat u maŋaŋ negoŋ tububihikuk. Unduŋ tiŋa nemenemek hogohogok wendiniŋ kobumuŋ tuguk. <sup>19</sup> Bepaŋ adi hatihati eŋ saŋiniŋniŋ diniŋ tinaulibiniŋ u mihiniŋ foloŋ toki tiŋa hatdok nadiune tuwot tuguk. <sup>20</sup> Tiŋa nemenek hogohogok kunum gineŋ be kwetfoloŋ adi Bepaŋ net kulema tubumintadok nadiŋa nimbune biyagoŋ hinek adi kolonŋdabek foloŋ loune naŋgatniŋdi kulema tubumintaguk.

*Jesu'walaŋ kumuŋniŋdi kulema tubumintaguk*

21 Hidi koomkwaha Bepañ sigilulum timiña nadikaule tiña kadakanij mebimebi tiñila welehek golinḡolinḡhinit hatiyagin. 22 Kañ Kilisto adi sigin gitnemnit mintaan kumuññinḡi kulema tubumintaan Bepañ'walañ namanda foloñ unḡoniñ, eñ welenik waliniñ, eñ yomnit mokit hatidok unduñ tinimguk. 23 Ala wendoktiña hidi nadisukiliti foloñ ulodikwambundaañ yalinila, Bepañ'walañ Mede Momoonḡi nadikunakunale tububihamguk u fihambaakneñ ala nadigwehegweheye mu taneñ. Bepañ'walañ Mede Momoon u hidi agañ haniñit, tiña hidi hogok moñ, metam kwetkwet maañ agañ yenintaunḡit. Biyagonḡ hinek, Pol, nu wendok kwanai-me hatilat.

*Bepañ'walañ mede hebiniñ u Jesu'walañkade foloonḡ mintaguk*

24 Biyagonḡ kuyonḡ, nu hehitubu-lodadok tiña folofigita nadiña nadifo tilat. Tiña nu adi Kilisto'walañ kayonḡbop uyadi ne'walañ foloonḡ doktiña unḡak tubulodadok nadilat. Eñ Jesu Kilistodi kayonḡbop doktiña folofigita nadidok yoguk u mu dapmaguk doktiña nu na'walañ foloone foloñ folofigitadi loune tuwot hinek tibaak. 25 Nu yadi Bepañ medeñiñ hebet doktiña Kayonḡbop diniñ kwanai-me mintaan hidi'walañkade Bepañ'walañ medeñiñ wanakanḡ hinek hanindidimedapmanḡok naniḡguk. 26 Mede uyadi koomkwaha tububihila hebiniñ hakukdi hali labune metam hogohogok mu nadiña hatitalabiinḡ. Ala nai indidegonḡ Bepañ'walañ metam unḡoniñ hatiyam indi

ninimbihikuk. <sup>27</sup> Tiŋa metam fekhinit mokit hidi'walaŋkade mede hebiniŋ diniŋ duhuduhu momooŋ wapum hinek mintalak. Uyadi Kilistodi welehiŋ gineŋ hatilak wondiniŋ folooŋ Bepaŋ'walaŋ hatihati kobuli wendok nadikunakunale tiŋ. <sup>28</sup> Adi'walaŋ mebi yeniŋa yeyam e metam hogohogok mede munte yeniŋa nadisu-fuliŋ diniŋ mebi hogohogok u yeniyehitubudidime tubudapmayam. Uyadi Kilistodut kadiŋa nadisukiliti metam folooŋ hinek mintaŋ Bepaŋ gut tomboyoutnenŋok unduŋ tiyam. <sup>29</sup> Biyagoŋ hinek, adi'walaŋ saŋiniŋŋiŋdi miŋ-ikiliti tinambune folofigita nadiŋila fiit gigne tiŋa kwanai i tilat.

## 2

### *Kilisto nadidahi tiŋa nadidakaledok*

<sup>1</sup> Indiŋ hanimbe nadinenŋ. Nu hidi bek, be Leodisiyahi eŋ metam noli namandatne mu kagiŋ, hiditok folofigita nadiŋa fafaŋenŋ kwanainelat.

<sup>2</sup> Tiŋa nu adi welehiŋ tubufafaŋewene welehiŋdi tububihila kifolok tubudapmaune Bepaŋ'walaŋ mede hebiniŋ diniŋ mebi Kilisto ne uŋakoŋ nadidahi timiŋa nadihinakaŋ nadidakaleneenŋ.

<sup>3</sup> Biyagoŋ kuyoŋ, adi'walaŋ nadinadi fuliŋgoŋiŋ, eŋ nadidakalenŋiŋ woŋ adi duhuduhu wapum hinek, u Kilisto gineŋ kamehebiŋit hatak.

### *Me mede folooŋhinit mokit u mu nadidok*

<sup>4</sup> Tiyaugne nebek niŋdi haniŋkulemaŋ welehiŋ tubufitneenenŋ yoŋa mede i yolat. <sup>5</sup> Nu na kweetniŋ hatilat, iŋgoŋ walane adi hidut hatilune hidi Kilisto nadisukilitimihinakaŋ kifolok

tiin. Unduŋ tiŋa kikadoko tubune habuŋa nadiwene momooŋ tilak. <sup>6</sup> Hidi Kilisto Jesu adi Wapumhik tihamdok kahilegiŋ doktiŋa adi'walaŋkade kadiŋa hatiyaneen. <sup>7</sup> Unduŋ tiŋa adi'walaŋkadegoŋ kokoihik foune kiliti-fafaŋeŋ yatneen. Eŋ Mede Momooŋ hanihehitubudidime tiŋit u yadi nadisukilitikwambundaan helemahelman Bepaŋ niutumba taneen. <sup>8</sup> Biyagoŋ kuyoŋ, nebek niŋdi metam'walaaniŋ nadinadi yalaŋ, folooŋ moŋ, u hanihehitubudidimeen nadisuhik tubugiyondaune adi yehikeleneeneŋ ala kikadoko tiyaneen. Mede undihi adi mamahi-papahiye'walaŋ mede folooŋhinit mokit eŋ kwet diniŋ saŋiniŋ foloŋ kadiŋa yohatiin. Kilisto'walaŋkade adi mu ulodiŋa yoiŋ.

*Bepaŋ adi Kilisto gut nihitomboyoukuk*

<sup>9</sup> Abe nadiin? Bepaŋ'walaŋ hatihati eŋ saŋiniŋniŋ diniŋ tinaulibiŋiŋ u Kilisto foloŋ tokiŋa hatak. <sup>10</sup> Unduŋ doktiŋa hidi adi'walaaniŋ nemek nemu lohineen. Biyagoŋ kuyoŋ, adi yadi saŋiniŋ hogohogok eŋ nemenemek lolonit tiin u yalakapmeen wapumhik hatiyemulak.

<sup>11</sup> Biyagoŋ kuyoŋ, adi'walaŋ feknit tigiŋ, uyadi Judahi'walaŋ fek kohonikdi foloonik foloŋ tiyam u moŋ. Adi hatihatihik komi kwihililiwenekuhambune Kilisto'walaŋ feknit tigiŋ. <sup>12</sup> Fek uŋoloknit titiŋdok Imeyout tihamuŋa adi'walaŋ kumuŋniŋ gineŋ hehitomboyouliŋit. Tiŋa indiŋ maan, Bepaŋ adi saŋiniŋniŋdi Kilisto kumuŋ gineniŋ tubukaikaguk, hidi maan saŋiniŋ uŋakoŋ nadisukilitigiŋ doktiŋa adi'walaŋ

pilapilatniḡ gineḡ hehitomboyouliniḡ. <sup>13</sup> Hidi koomkwaha fekhinit mokit hatiḡila kadakaninḡ kaka tiḡa dabahi hatilune Bepaḡ adi yomhik tumolokuhamuḡa Kilisto gut hehitubu-kaikaguk. <sup>14</sup> Unduḡ tiḡa yeguk e, mede wobunik dininḡ kibikonḡ moḡgotdok pepa foloḡ youhebet hakuk u ulilagineḡ tiḡa looḡ kolonḡdabek foloḡ tebiune dampaguk. <sup>15</sup> Unduḡ tiḡa yeguk e, yabap saḡininḡhinit eḡ wohiyehinit adi'walaḡ saḡininḡhik ula tiḡa foguk. Tiḡa adi kolonḡdabek foloḡ agaḡ yalakapmeguk wendininḡ mebihik miḡoḡ tubuhautaguk.

*Nemek gilegilem doktiḡa bombonḡ folooḡ mu wabidok*

<sup>16</sup> Metam nolidi kale nanaḡe nanaḡdok kameheḡa dokoniḡoḡ hatidok, be Sabat dininḡ gulet, be muyakip gulet u be u, iitdok be mu iitdok wondoktiḡa hanihep mu tiyaneenḡ. <sup>17</sup> Nemek undihi adi wolininḡ hogok yodok. Foloḡ kougonoḡ mintawaak wondininḡ wolininḡ timenḡ mintaguk. Ala folooḡ adi Kilistodi tubumintaguk hatak. <sup>18</sup> Metam noli adi nehitok nadiune didimehi eḡ fofonḡhinit wele tubune hatiḡila aḡelodok nadiyembune loune gikiḡoḡ tiyemiinḡ, eḡ titinḡ komihidi nadinadihik tubugiyondaune welehiḡ dininḡ nadinadi dokotombune nemek hebininḡ kanadi tiyam yoḡa wendok nadiune folooḡ tubune sigihik hogok tilofit tiinḡ. Metam undihi u yadi biyabune mu hehitubu-gweheyeyaneenḡ. <sup>19</sup> Biyagoḡ kuyoḡ, adi yadi Kilisto gut mo-mooḡoḡ mu galiinḡ. Kilisto adi mebinik, eḡ indi



adi adi'walaŋ kayoŋ kohoŋ. Unduŋ doktiŋa susululuniki mebinik gineniŋ tububihila daneen fowoŋ gom be kitiliniŋ yaweneen tubukilitilak. Unduŋ tiŋa Bepaŋ saŋiniŋniŋ nimtei tubune bedinaditom tiyam.

*Nanaŋe yokamehep diniŋ mede adi metam welehiŋ maaneŋ mintaguk mu yodok*

<sup>20</sup> Hidi Kilsto'walaŋ kumuŋ gineŋ youdihina kwet diniŋ titiŋ be nadinadi sigilulum nobu timiyanen kaŋ maŋgoŋde kwetfoloŋ hatihati yendok nadiune yohik mebi dabugoŋ tubune yodoko medeniŋ takaliŋ? <sup>21</sup> Mede indiŋ. Yoŋ adi mu honeweŋ, eŋ yoŋ adi mu naweŋ, eŋ yoŋ adi mu tibeŋ. <sup>22</sup> Biyagoŋ kuyoŋ, nemek moŋgo hinaŋ tiŋa bibiŋdok wendok mede yokamehep uyadi metam nehi welehiŋ gineŋ nadisuŋa yeniyehitubu-didime tiŋ. <sup>23</sup> Metam undihidi nehi'walaŋ nadinadi tubumintaŋ nadinadi fuliŋhinit wele tiŋa dokoniŋ eŋ foloohiki lanŋatnadok mede u yobune biyagoŋ nabugoŋ tilak. Inŋoŋ mede wendi biyagoŋ mu tilak, be wendi welehiŋ komi diniŋ siloda hogohi tuwot mu kameheyembek.

### 3

*Nemek wahin hatak wendok welehiŋki nadisyaneŋ*

<sup>1</sup> Hidi agaŋ Kilsto pilat tuguk adut nobu tomboyokiŋ kaŋ wahin Bepaŋ heben gineŋ Kilsto saŋiniŋnit hatilaknen nemek hatak wendok nadisyaneŋ. <sup>2</sup> Kwetfoloŋ inoŋ nemek hatak wendok adi mu nadiyaneŋ. Adi toboniŋ

wahinkade nemek hatak wendok adigili welehek en nadisuhik unandin nadisuyaneen. <sup>3</sup> Biyagon kuyon, hidi agan kumungin doktina hatihatihik Kilisto gut Bepan ginen hebihatak. <sup>4</sup> Kaugon hatigene Kilisto adi Hatihati Molomdi mingon mintane hidi maan adut hauta holiholinenjin ginen mingon mintaneen.

*Welehek komihi dihinja beyakutdok*

<sup>5</sup> Nemek indihidok adigili dokoningon hatinila welehek komi kwetfolon dinin kadakaninjit u ulukumuneen. Kefifile, welehek gengenjit, siloda kadakanin, titin kadakanin titindok weleyouyout, me noli'wala bombondok nadigalika. Nebek titin undihi hati tibaak aditok adi ne'wala titin be hatihatijninji wapumjinj timilak undun yodok. <sup>6</sup> Nemek yotafomun hogohogok wondinin kibikon dok mede yodapman adi Bepan ne tibaak. <sup>7</sup> Hidi adi koom nemek u mongo hatinja nadiune welehek dinin bombon foloon tuluguk.

<sup>8</sup> Ingon nai indinde adi nemek undihi hogohogok u wabidapman tineen. Undun tinja yeneen e, kwihita belep, kongolondangon, yofitet, en medehaki u bibin hinek tineen. <sup>9-10</sup> Hidi welehek komihi kudi yougitongitonhinit u dihibeyakula welehek kobuli mongo kadahiune foune mongola hatin doktina mede yala yoyo u maan wabi hinek tineen. Biyagon kuyon, welehek uyadi Bepan ne gitipmun tubumintaune nadinadinit en ne'wala folonamandap undinin hati mintalak. <sup>11</sup> Undun doktina danedane hatihati u agan dapmaguk. Gilikme en Judame, fekhinit en

fekhinit mokit, luhinenhi en guyanhi, tipilapilayemetam en me bombonji wanakan hogohogok Kilisto kubugonji nihikiudapmaan talitimenjik hatidapmanimilak.

*Bepan'wala Mede Momoon nadija hatidok*

<sup>12</sup> Bepan negon welesilon tihamuja hehidaneen netok gigit hehikahileguk doktija hidi titin fofohi indihhi wendi dahidahihik tubune kadahija hatiyaneen. Me nolidok welebulaningon nadiyahnadiyahem, en nadiloda, en hidetok nadiune fofonit tiluwaak, en menot tija baigon nadikulema, undun tubune kedem tibaak.

<sup>13</sup> Hidi yadi menot tiyaneen en lekingonhik gineen mede mintaune yom bibin tiyaneen. Wapumdi yomhik bihamguk doktija hidebo undugon taneen.

<sup>14</sup> Tija nemenemek hogohogok u tinila welesilon wanan tubune wendi nemenemek hogohogok u wanan yehikiula tubuwalandaan tubudidime-dapmaluwaak.

<sup>15</sup> Tija Kilisto'wala kulemadi welehih kadokoluwaak. Biyagon kuyon, Bepandi hidi kulemangon en welekubugon hatidok hanilak ala u tinila yonadifo maan tija hatiyaneen.

<sup>16</sup> Kilisto'wala mededi hidi'wala welehih maanen duhuduhunit hahatdok fafaje tiyaneen. Undun tija mede fulingon mebimebi u kiyonadi en kiulihi tija kininjiliti tiyaneen. Undun tija Bepan'wala kap tolune Munabulidi hehitubu-lodaune welehih gineen kap kobuhi tobuhila Bepan niutumbaan tomiyaneen.

<sup>17</sup> Undun tinila welehihki be kohohikdi nemek tine nadija kan Wapum Jesu nadisukilitimiya tiyaneen. Tija adi wou

folon Baŋ Bepanđi momoon tihamulak wondok niutumbayaneŋ.

*Hekimibet, tipilapilaye-metam eŋ bombonđi dinin mede*

<sup>18</sup> Tam yohohiyehinit, hidi yadi Wapum doktiŋa yohohiyedok nadiyembune loune mede tilolon tiyemaneŋ. Unduŋ tubune tuwot hinek tuluwaak.

<sup>19</sup> Me tamhiyehinit, hidi yadi tamhiye u welehiŋki yabukahile tiyaneŋ. Tiŋa figitaŋgoŋ adi mu tiyemaneŋ.

<sup>20</sup> Eŋ wapmihi, hidi yadi mehim-behiyedi mede haniyaneŋ tuwot nadiŋa mede tilolon tiyaneŋ. Unduŋ tubune Wapum adi hiditok welemomoon nadihamuluwaak.

<sup>21</sup> Baŋ heki, hidi wapmihihiyedi nadilakata tiŋa gweheye tineeneŋ ala fafaŋeneŋgoŋ mu toyemaneŋ.

<sup>22</sup> Tipilapilaye metam, hidi maan undugoŋ kwetfolon me bombonđihiye'walaŋ mede wanakaŋ tilolon tiyemaneŋ. Metamdi habunadiune utumbadok adi mu tiyaneŋ, adi Wapumdok nadiune loune welehiŋki hinek tiyaneŋ. <sup>23</sup> Tiŋa undugoŋ kwanaihiŋ hogohogok uyadi metam doktiŋa moŋ, adi Wapum doktiŋa lodaloda folon tiyaneŋ. <sup>24</sup> Biyagoŋ kuyoŋ, indiŋ hinek nadisuyaneŋ. Kwanai dinin tuwaŋiŋ adi kunum gineŋ nemek momoon hiditok mebit boiŋit hakiŋ u Wapum'walaaniŋ beneŋ. Wendegoŋ tiŋa Wapum Kilisto'walaŋ tipilapilaye-metamŋiye hatiŋ. <sup>25</sup> Nebek niŋ adi kwanaiŋiŋ tubukadaka tibaak adi yadi wendiniŋ kibikoŋ bewaak. Wapum adi titiŋhiŋ kedehi be

hogohi wendiniᅇ kibikonᅇ tuwolit hinek tubu-  
udaneyemulak.

## 4

<sup>1</sup> Me bombonᅇi heki, hidi maanᅇ metam tip-  
ilapilaye tihamiinᅇ aditok nemek didimeningonᅇ  
nadididimenᅇ tiyemaneenᅇ. Tiᅇa hide'walaᅇ bom-  
bonᅇihik kunum gineᅇ hatilak aditok nadikaule  
mu timiyaneenᅇ.

### *Bepaᅇ ninadi titiᅇdok mede*

<sup>2</sup> Hidi gigne tiᅇa ninadi kwanai taneenᅇ. Tiᅇa  
hatihatihik momoonᅇ hinek kadokoonᅇ ninadiᅇa  
niutumbayaneenᅇ. <sup>3</sup> Tiᅇa inditok maanᅇ Bepaᅇ  
ninadiune Bepaᅇdi ne'walaᅇ medeᅇniᅇ diniᅇ tali  
dilitomnimbune Kilisto'walaᅇ mede hebinᅇ u  
yohautayaneem. Biyagonᅇ kuyonᅇ, nu yadi mede  
wendegonᅇ tiᅇa yot fafaᅇniᅇ gineᅇ hatat. <sup>4</sup> Hidi  
ninadidi nehiulihine nu mede miᅇgonᅇ yohau-  
taluwaaᅇ. Bepaᅇdi unduᅇ titiᅇdok nadinamguk.

<sup>5</sup> Metam Bepaᅇ mu nadisukilitimiinᅇ heki dut  
kimindeᅇa kaᅇ nemek nadidakaleenᅇ tiyaneenᅇ.  
Eᅇ yehitubu-loda titiᅇdok tiulidokoonᅇ woom ta-  
neenᅇ. <sup>6</sup> Hidi metamdi mede nadiᅇa nadiga-  
lika titiᅇdok mede momohi undihi hogok yoy-  
aneenᅇ. Unduᅇ tiᅇa metam noli'walaᅇ mede-  
hik tubu-udaneyemdok baigonᅇ nadikuwali tubu-  
udaneyemaneenᅇ.

### *Poldi Tikikus dut Onesimas yapmeune Koloside ugumuk*

<sup>7</sup> Na'walaᅇ mede kahat adi Tikikusdi hanim-  
baak. Adi adi notnik fofoonᅇ eᅇ tubulodanik  
momoonᅇ eᅇ Wapum'walaᅇ mededok tipilapilaye

kwanai mohinek tilak. <sup>8</sup> Biyagon kuyon, adigon hatihatnik dinin mede kahat tihamunja welehik tubukilitidok ninikulene ulak. <sup>9</sup> Adi Onesimas gut woon inon dinin mede kahat u wanakan hanindapmademEEK. Onesimas adi hide'walaaningon. Ala adi maan notnik fofoon en tubulodanik momoon.

### *Mede yodapman*

<sup>10-11</sup> Me notne yot fafaenenin ginen nongon hakamut, Alistaka, adi haniutumba tilak. En Banabas namen Mak gut Jesu (wou noli Yusto) adi maan haniutumbayamuk. Makdok adi agan hanindakalegut ala nobu usuwaune kan menot timineen. Mewoi wendi hogok Judame heki'walaanin mintagin ingon Bepan'wala hati-hati kobuli dinin kwanai nehitubu-lodaan tubune welemomoon nadilat. <sup>12</sup> En hide'walaanin me nin Epafala, Kilisto'walaanin tipilapilaye-me, adi maan haniutumbalak. En hidi fafaenenin Bepan'walaanin manin mede nadidakaleen nemene-mek didimeningon titindok yonja helemahelman hehiulihinja Bepan ninadilak. <sup>13</sup> Nu adi'walaanin mebi agan nadilat. Adi yadi hiditok en Leodisyahidok en Hilapolihi Bepan nadisukilitimiin aditok walaanin kwanai wapum hinek tilak. <sup>14</sup> En haguwo kwanai-menik momoon, Luk, en Dima, meyat adi maan haniutumbayamuk.

<sup>15</sup> Tina nu Leodisyahi metam Bepan nadisukilitimiin en Nimpa en Kayonbop adi yolinen bopnein yenitutumbalat u yeninen. <sup>16</sup> Pepa i metam kunayembune nadidapmaune Leodisyahi Kayonbop aditokbo kameune uune adibo

yokunatneen. En aditok nin youyemgut u hidibo hambune yokunatneen. <sup>17</sup> Akipa adi indin ninee. Kwanai Wapumdi ganguk u baigon hinek kadokoon nadidakaleen tuluwaan.

<sup>18</sup> Pol, nu na'walaŋ wotnene youkudip i kamehamulat. Yot fafaŋenineŋ itoulat nutok maan nadisunamaneen. Bepaŋ'walaŋ silon toboŋŋinŋi hidigut hatuwaak.

**Bepaŋ'Walaŋ Folofolok Kobuli  
Genesis, Exodus, Psalms, and the New Testament in  
the Numanggang Language of Papua New Guinea  
Sampela hap Buk Baibel long tokples Numanggang**

copyright © 2005 Wycliffe Bible Translators, Inc.

Language: Numanŋaŋ (Numanggang)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 11 Nov 2022 from source files dated 9 Oct 2020

217908e9-ce08-5ac3-9947-124c48579a74